



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 3 Zakona o povjeravanju javnih ovlaštenja (Službeni glasnik Brčko distrikta BiH, brojevi 6/04, 19/07 i 11/09), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 17/08 i 20/10) i Prijedloga odluke gradonačelnika, broj: 02-01.2-001286/10 od 30. 11. 2010. godine, Skupština Brčko distrikta BiH, na 36. redovnoj sjednici održanoj 2. decembra 2010. godine, donosi

ODLUKU
O POVJERAVANJU JAVNIH OVLAŠTENJA STRUČNOJ INSTITUCIJI ZA
STANICE TEHNIČKOG PREGLEDA VOZILA U BRČKO DISTRIKTU BiH

Član 1
(Predmet)

Ovom odlukom povjeravaju se javna ovlaštenja i prenosi dio poslova vezanih za rad stanica za tehničke preglede u Brčkom stručnoj instituciji „CENTAR ZA TEHNIČKE SISTEME“ d.o.o. Brčko distrikt BiH (u daljnjem tekstu: „stručna institucija“).

Član 2
(Povjereni poslovi)

(1) Stručnoj instituciji iz tačke 1 ove odluke prenosi se dio poslova iz nadležnosti Odjeljenja za javne poslove Vlade Brčko distrikta BiH, kako slijedi:

- a) utvrđivanje uslova za rad stanica za tehnički pregled vozila u Brčko distriktu BiH,
- b) vršenje stručnog osposobljavanja kadrova za obavljanje poslova kontrolora tehničke ispravnosti vozila i drugih lica koja rade na stručnim poslovima tehničkog pregleda,
- c) organizovanje periodične provjere znanja kontrolora tehničke ispravnosti vozila i drugih lica koja rade na stručnim poslovima tehničkog pregleda,
- d) vršenje obrade podataka i izrada analiza iz oblasti tehničkog pregleda vozila,
- e) davanje pisanih uputstava i informacija, te izrada stručnih publikacija iz oblasti tehničkog pregleda vozila,
- f) organizovanje uvezivanja stanica za tehnički pregled vozila i drugih zainteresovanih subjekata u jedinstven informatički sistem koji je u vezi sa poslovima tehničkog pregleda vozila,
- g) nadzor nad baždarenjem opreme na stanicama za tehnički pregled vozila.

(2) Ostali poslovi iz ove oblasti ostaju u nadležnosti Odjeljenja za javne poslove Vlade Brčko distrikta BiH.

(3) Poslovi iz stava 1 ovog člana povjeravaju se na period od pet godina.

Član 3 (Način vršenja javnih ovlaštenja)

- (1) Stručna institucija „CENTAR ZA TEHNIČKE SISTEME“ d.o.o. Brčko distrikt BiH, povjerene poslove će da vrši u skladu sa odredbama ove odluke, Pravilnikom o tehničkim pregledima vozila (Službeni glasnik Brčko distrikta BiH, brojevi 08/07, 31/07, 36/08, 01/09 i 28/09), drugim propisima koji se donose iz ove oblasti na nivou Bosne i Hercegovine, evropskim standardima i dostignućima u ovoj oblasti, odlukama nadležnih organa Brčko distrikta BiH kojima se uređuje ova oblast.
- (2) U vršenju javnih ovlaštenja stručna institucija „CENTAR ZA TEHNIČKE SISTEME“ d.o.o. Brčko distrikt BiH, dužna je da saraduje sa državnim organima i sa stručnim institucijama koje su izabrane u entitetima, a s ciljem unapređivanja rada u oblasti tehničkih pregleda vozila.
- (3) Stručna institucija može pokrenuti inicijativu i predložiti gradonačelniku Brčko distrikta BiH preduzimanje aktivnosti radi unapređenja stanja u oblasti tehničkih pregleda vozila, s ciljem usklađivanja sa standardima i propisima koji se primjenjuju u državama Evropske unije.

Član 4 (Finansiranje)

- (1) Stručna institucija će se finansirati iz sredstava naplaćenih od date usluge, u skladu sa jedinstvenim cjenovnikom usluga tehničkih pregleda vozila u Bosni i Hercegovini, koji je sastavni dio Pravilnika o tehničkim pregledima vozila.
- (2) Međusobna prava i obaveze između ugovornih strana, stručne institucije i Brčko distrikta BiH - Odjeljenja za javne poslove, detaljnije će se regulisati ugovorom koji će u ime Brčko distrikta BiH potpisati šef Odjeljenja za javne poslove.

Član 5 (Nadzor)

- (1) Upravni nadzor nad radom stručne institucije vršit će Odjeljenje za javne poslove Vlade Brčko distrikta BiH, imenujući komisiju od stručnih lica za kontrolu rada povjerenih poslova.
- (2) Stručna institucija podnosi izvještaj o vršenju povjerenih poslova dva puta godišnje organu iz stava 1 ovog člana.
- (3) Na zahtjev organa uprave iz stava 1 ovog člana, stručna institucija dostavlja podatke i dokumente koji su od značaja za vršenje nadzora u obavljanju javnih ovlaštenja.
- (4) Ako stručna institucija kojoj su povjerena javna ovlaštenja ne vrši povjerene poslove u skladu sa zakonom i drugim propisima, nadležni organ, koji vrši upravni nadzor, obavezan je da pismeno upozori subjekta koji vrši javna ovlaštenja i predloži mu mjere za rješavanje tog pitanja ili druge mjere s ciljem obavljanja povjerenih poslova u skladu sa zakonom.

Član 6 (Prestanak javnih ovlaštenja)

- (1) Javna ovlaštenja povjerena ovom odlukom prestaju odlukom Skupštine Brčko distrikta BiH, na prijedlog Odjeljenja za javne poslove u sljedećim slučajevima:
 - a) ako stručna institucija povjerene poslove ne obavlja stručno i blagovremeno,

- b) ako na zahtjev organa koji vrši upravni nadzor, a najmanje dva puta godišnje ne dostavi izvještaj i ne dostavlja podatke i dokumente od značaja za vršenje upravnog nadzora,
- c) ako izvještaj o radu stručne institucije ne bude pozitivno ocijenjen od strane organa koji vrši upravni nadzor,
- d) prestankom rada stručne institucije,
- e) istekom vremena na koji su povjerena javna ovlaštenja,
- f) ako se nadležno odjeljenje stručno i kadrovski osposobi za obavljanje povjerenih poslova,
- g) danom donošenja odluke Skupštine iz stava 1 ovog člana, stručna institucija gubi javna ovlaštenja povjerena ovom odlukom.

Član 7

Ova odluka stupa na snagu danom donošenja i bit će objavljena u Službenom glasniku Brčko distrikta BiH.

Broj: 01-02 -319/10
Brčko, 2. decembra 2010. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik

Dostavljeno:

- 1. Predsjedniku
- 2. Dopredsjedniku
- 3. Gradonačelniku
- 4. Odjeljenju za javne poslove
- 5. „Centar za tehničke sisteme“ d.o.o. Brčko distrikt BiH
- 6. Sektoru za koordinaciju politika i opće poslove –
Odsjeku za opće poslove
- 7. Arhivi